



Sokongan buat petugas media di Gaza

Oleh Nor Azizah Mokhtar - November 18, 2023 @ 4:06pm
bhnews@bh.com.my

KUALA LUMPUR: Lebih 100 pengamal media Malaysia berkumpul di Dataran Merdeka di sini, hari ini sebagai tanda solidariti untuk wartawan dan jurugambar di Gaza yang terbunuh akibat konflik Israel-Palestin sejak lebih sebulan lalu.

Dianjurkan menerusi komuniti Safe Press For Gaza (SP4G), suara media Malaysia disatukan sebagai menyuarakan keimbangan mendalam terhadap jumlah kematian wartawan yang membuat liputan konflik itu.

Bermula jam 11 pagi itu, ia mendapat kerjasama 26 kelab media dari seluruh negara antaranya Kesatuan Kebangsaan Wartawan (NUJ), Gerakan Media Merdeka (Geramm), Crime Journalist Association (CiJA) dan Foreign Correspondent's Club Malaysia.

Selain itu, Kelab Media Pahang, Pengamal Media Melaka (PENDIKA), Persatuan Pengamal Media Perak dan Kelab Media Johor (KMJ).

Jurucakap SP4G, Sairien Nafis, berkata himpunan itu adalah tanda solidariti dengan rakan media di Gaza.

"SP4G mengutuk sekeras-kerasnya tindakan tentera dan kerajaan Israel menyangar wartawan dan keluarga mereka.

"Sebagai wartawan dan pekerja media, kami mendesak pemimpin bilik berita di negara Barat untuk memastikan liputan jelas mengenai tindakan Israel terhadap rakyat Palestin, serta mengakui kekejaman yang berlaku.

"Serangan dan pengepungan rejim Zionis sejak enam minggu lalu mengorbankan lebih 11,000 rakyat Palestin termasuk 42 wartawan.

"Angka ini menandakan konflik paling teruk bagi pekerja media sejak 1992, menurut badan Committee to Protect Journalists (CPJ)," katanya ketika ditemui pemberita, hari ini.

Beliau berkata, keluarga petugas media turut menjadi sasaran Israel apabila dibom dan dibunuh dengan kejam sebagai amaran kepada pengamal media untuk tidak menyebarkan kebenaran.

Sairien berkata, media Malaysia mahu meniup semangat kepada pengamal media di Gaza untuk terus membuat liputan bagi menyebarkan kebenaran kepada dunia.

"Kita menggesa media Barat menyampaikan berita benar dan tepat mengenai serangan Israel terhadap rakyat Palestin.

"Tugas media adalah melapor berita betul, bukan penipuan dengan pelbagai propaganda," katanya.

Sementara itu, pengamal media antarabangsa berterima kasih atas sokongan rakan di Malaysia yang memperjuangkan nasib rakyat Palestin.

Ketua Biro Al Jazeera Malaysia, Sameer Allawi, 57, berkata, ramai rakan sekerjanya merangkumi wartawan, 'YouTuber' dan 'blogger' di Gaza kehilangan ahli keluarga.

"Ada di antara mereka kehilangan sehingga 16 ahli keluarga, selain diugut dan diberi amaran ketika bertugas, hingga terpaksa berpindah manakala ada ahli keluarga dibunuh.

"Walaupun keluarga kecil saya mengikut tinggal di Malaysia sejak 12 tahun lalu, saya ada keluarga besar di tanah air dan sudah tentu saya bimbang dengan keselamatan mereka," katanya.

Sementara itu, Setiausaha CiJA, Hafidzul Hilmi Mohd Noor, berkata prinsip kebebasan akhbar perlu ditegakkan dan memupuk landskap media global yang menghargai kebenaran serta keadilan.

"Semoga sokongan ini akan membolehkan rakan kita (media) dan Gaza terus bertahan dalam memperjuangkan kebenaran," katanya.